

續  
文  
獻  
通  
考

續文獻通考卷之一百十七

皇明進士雲間王圻纂輯

王禮考 朝儀 金

金

熙宗天眷二年詳定常朝及朔望儀 准前代制以朔日  
六日十一日十五日二十一日二十六日爲六祭日後  
又定制以朔望日爲朝參餘日爲常朝凡朔望朝參日  
百官卯時至幕次皇帝辰刻視朝供御弩手繳子直於  
殿門外分兩面排立司辰入殿報時畢皇帝御殿坐鳴  
鞭閣門報班齊執擎儀物內侍分降殿階兩旁面南立  
宿衛官自都點檢至左右親衛祇應官自宣徽閣門祇

候先兩拜班首少離位奏聖躬萬福兩拜弩手繳子先  
於殿門外東西向排立俟奏聖躬萬福時卽就位北面  
山呼聲喏起居畢卽相向對立擎御傘直立左班內侍  
上都點檢以次升殿副點檢在少南東西相向立左右  
衛在殿下東西相向立閤門乃引親王班贊班首名以  
下再拜訖班首少離位奏聖躬萬福歸位再拜畢先退  
次引文武百僚班首以下應合朝叅官并府運六品以  
上官皆左入至丹墀之東西向鞠躬畢閤門通唱復引  
至丹墀閤門贊班首名以下起居舞蹈五拜又再拜畢  
領省宰執升殿奏事殿中侍御史對立於左右衛將軍  
之北少前修起居東西對立于殿欄子內副階下餘退

右出初帝就坐置寶匣於殿階之上東南角後定制師  
傅起居畢御案始東入置定捧案內侍東西分下侍殿  
隅直日主寶捧寶當殿叩欄奏封前符寶郎及當監印  
郎中各一員監當主分令史用印訖主寶吏封授主寶  
俟奏事畢進封訖內侍徹案若常朝則親王班退引七  
品以上職事官分左右班入丹墀再拜班首稍前起居  
畢復位再拜宰執升殿餘官分班退

世宗大定二年命臺臣定朝叅禮五品以上職官趨朝朝  
服入局治事則展皂自來朝叅除殿前班外若遇朔望  
自七品以上職事官皆赴其餘朝日五品以上職事官  
尋赴六品以下止於本局司治事如左右司員外郎侍

御記注院等官職雖不係五品亦赴朝叅若拜詔則但有職事及七品以上散官皆赴朝會吏員令譯使通事檢法各於本局待官員朝退赴局簽押文字不得於宮內署押七品以下流外職遇朝日亦不合入宮如左右司都事有須合奏事乃聽入宮七品以上職事官如遇使客朝辭見日依朔望日皆赴若元日聖節拜詔車駕出獵送迎詣祖廟燒飯但有職事并七品以上散官皆赴凡親王宗室已命官者年十六已上皆隨班赴起居大定五年右諫議大夫移刺子敬言猛安謀克不得與州鎮官隨班入見非軍民一體之意上是其言責宣徽院令隨班入見凡班首遇朝叅有故不赴以次押班凡

五品以上及侍御史尚書諸司郎中太常丞翰林修撰起居注殿中侍御史補闕拾遺赴召或假一月以上若除官出使之類皆通班人見辭謝除官於殿門外見謝班皆舞蹈七拜辭班四拜門見謝辭並再拜

凡朔望常朝日殿下列衛士簾下置甲兵正隆元年海陵去甲兵惟存錦衣弩手百人分立兩階其儀都副點

檢公服偏帶

常朝則展紫

左右衛將軍宿直將軍展紫金束

帶各執玉水晶及金飾骨朶左右親衛盤裏紫襖塗金束帶骨朶佩兵械供御弩手傘子百人並金花交脚幞頭塗金銅釵觀花束帶骨朶左右班執儀物內侍二十人展紫塗金束帶朝叅日弩手傘子直于殿門外分兩

面排立司辰報時畢皇帝御殿坐鳴鞭閣門報班齊執  
擎儀物內侍分降殿階南面立點檢司起居弩手傘子  
于殿門外北面山呼聲喏訖卽于殿門外東西相向排  
立都點檢以次三員陞殿都點檢在東近南左副又少  
南右副在西東向對立左右衛將軍在殿下東西對立  
省臣隨班起居畢左右司侍郎從宰執奏事殿中侍御  
史隨班起居畢東西對立于左右衛將軍之北少前修  
起居注分殿陞東西對立于殿欄外副階下以俟奏事  
畢皇帝還閣侍衛者乃退

凡遇大禮大朝會有內外立仗熙宗皇統元年正月上  
冊寶立仗一千一百八十八至海陵時用三千人世宗

欄旗二重輪旗一三人紅紫排欄旗二左攝提旗一三人黃紫排欄旗二青龍旗一三人紅黃排欄旗二木星旗一三人紅紫排欄旗二火星旗一三人黃紫排欄旗二土星旗一三人紅黃排欄旗二金星旗一三人紅紫排欄旗二水星旗一三人吏兵并紫排欄旗各一北岳旗一三人吏兵并龍君旗各一東岳旗一三人龍君并黃熊旗各一中岳旗一三人黃熊并赤豹旗各一西岳旗一三人赤豹并力士旗各一南岳旗一三人力士并虎君旗各一朱雀旗一三人虎君并天馬旗各一右第五行北奎旗一三人婁旗一三人胃旗一三人昂旗一三人畢旗一三人觜旗一三人參旗一三人井旗一三

人鬼旗一三人皆均用二旗如前柳宿旗一三人紅龍  
并黃排欄旗各一星宿旗一三人紅黃排欄旗二張宿  
旗一三人紅紫排欄旗二翼宿旗一三人紫黃排欄旗  
二軫宿旗一三人紅黃排欄旗二重輪旗一三人紅紫  
排欄旗二白虎旗一三人紅黃排欄旗二東方神旗一  
三人紅紫排欄旗二南方神旗一三人黃紫排欄旗二  
中央神旗一三人紅龍排欄旗二西方神旗一三人紅  
紫排欄旗二北方神旗一三人力士并紫排欄旗各二  
風伯旗一三人力士并虎君旗各一雨師旗一三人虎  
君并黃熊旗二雷公旗一三人黃熊并赤豹旗二電母  
旗一三人赤豹并吏兵旗二北斗旗一三人吏兵并龍

君旗二玄武旗一三人龍君井天馬旗二三人執一旗者重立二人各執小旗者亦重立殿門外仗亦從北留中道飛麟旗駃騠旗鸞旗麟旗馴象旗各二共十人從中分列爲第一重鴟鷂旗貔旗玉燕旗三角獸旗黃鹿旗各二共十人次外分列爲第二重其次第一部都尉三員第二部至第五部俱二員爲第三重又其次五部各刀盾二十爲第四重又其次五部各弓矢二十爲第五重左右同

黃麾細仗攝官八十八人擎執一千二百五人編排職掌九人內仗中道左一行自北西向排列黃麾幡一首執者三人大雉扇六中雉扇六小雉扇六朱團扇六

睨四紅大傘一紫方傘二華蓋一凡傘扇之上皆有碧欄官一右行東向排次同面北第一行長壽幢一居中牙門旗八共二十四人分左右第二行君王萬歲旗五人居中日旗五人監門校尉五人在左月旗五人監門校尉五人在右第三行五方龍旗十五在左五方鳳旗十五在右第四行紅龍旗三十四第五行紅龍旗三十四皆分左右第六行自內而東太平莖紋合璧莖紋赤龍青龍旗各一旗五人通直一人大將一人未午巳辰卯寅旗各一青天王旗白天王旗各一自內而西祥雲聯珠祥雲黃龍白龍黑龍旗各一旗五人通直一人大將一人申酉戌亥子丑旗各一緋天王旗皂天王旗各

一第七行自內而東河濟江濟兕赤熊馴犀角端鵝鵠  
網子旗各一旗五人自內而西淮濟濟濟兕赤熊馴犀  
角端鵝鵠網子旗各一旗五人 外仗左邊右向自北  
排列第一行五部侍御史大將軍折衝都尉各一主帥  
各二第二行第一部絳引幡五首十五人龍頭竿四弓  
矢五羯鼓二儀鎗斧五龍頭竿四弓矢五朱刀盾五綠  
刀盾五龍頭竿四儀鎗斧五朱刀盾五綠刀盾五龍頭  
竿四小戟五龍頭竿四小戟五第二部至五部無絳引  
幡餘色並同以次相接而南右五部東向亦如之左第  
三行從北角亢氏房心尾箕斗牛女虛危室壁旗各一  
旗三人次重輪左攝提青龍旗各一木火土金水星各

一北東中南西岳旗各一旗三人次紫排欄四黃排欄  
四紅排欄四吏兵旗二天馬旗一右第三行從北奎婁  
胃昂畢觜參井鬼柳星張翼軫旗各一旗三人次重輪  
右攝提白虎旗各一東南中西北方神旗各一風伯雨  
師雷公電母北斗旗各一旗三人次紫排欄四黃排欄  
四紅排欄四吏兵旗二天馬旗一

初卽位儀 太祖收國元年春正月壬申朔諸路官民  
耆老畢會議創新儀奉上卽皇帝位阿離合懣宗翰乃  
陳耕具九祝以闢土養民之意復以良馬九隊隊九匹  
別爲色并介冑弓矢矛劒奉上國號大金建元收國  
元旦聖誕上壽儀 皇帝陞御座鳴鞭報時畢殿前班

小起居各復位立舍人引皇太子并臣僚使客合班入  
至丹墀舞蹈五拜平立閣使奏諸道表目皇太子以下  
皆再拜引皇太子升殿褥位搢笏捧盞盤進酒皇帝受  
置於案皇太子退復褥位轉盤與執事者出笏二閣使  
齊揖入欄子內拜跪致辭云元正啟祚品物咸新恭惟  
皇帝陛下與天同休若聖節則云萬壽令節謹上壽卮  
伏願皇帝陛下萬歲萬歲萬歲祝畢拜興復褥位同  
殿下臣僚皆再拜宣徽使稱有制在位皆再拜宣答曰  
履新上壽與卿等內外同慶聖節則曰得卿壽酒與卿  
等內外同慶詞畢舞蹈五拜齊立皇太子搢笏執盤臣  
僚分班教坊奏樂皇帝舉酒殿上下侍立臣僚皆再拜

皇太子受虛爵退立褥位轉盤盞與執事者出笏左下殿樂止合班在外臣僚皆再拜分引與宴官上殿次引宋國人從至丹墀再拜不出班奏聖躬萬福再拜唱有勅賜酒食又再拜各祇候平立引左廊立次引高麗夏人從如上儀畢分引左右廊立御菓牀入進酒皇帝飲則坐宴侍立臣皆再拜進酒官接盞還位坐宴官再拜復坐行酒傳宣立飲訖再拜坐次從人再拜坐三盞致語揖從使并從人立誦口號畢坐宴侍立官皆再拜坐次從人再拜坐食入七盞曲將終揖從人立再拜畢引出聞曲時揖臣使起再拜下殿菓牀出至丹墀合班謝宴舞蹈五拜各祇候分引出

受尊號儀 皇統三年太師宗幹率百僚上表請上皇帝尊號凡三請詔允七日遣上京留守與告天地社稷析津尹告太廟十日帝服袞冕御元和殿宗幹率百僚恭奉冊禮冊文云云臣等謹奉玉冊玉寶上尊號曰崇天體道欽明文武聖德皇帝是日皇帝改服通天冠宴二品以上官及高麗夏國使十二日恭謝祖廟還御宣和門大赦改元大定七年恭上皇帝尊號前三日遣使奏告天地宗廟社稷前二日諸司停奏刑罰文字百官習儀於大安殿庭兵部帥其屬設黃麾仗於大安殿門之內外宜徽使帥儀鸞司於前一日設受御冊寶壇於大安殿中間又設御榻於壇上又設冊寶幄次於大安

殿門外及設皇太子幄次於殿東廊又設羣官次于太安門外大樂令與協律郎前一日設宮縣于殿庭又設登歌樂架於殿上立武表於殿下符寶郎即其日俟文武羣官入奉八寶置於御座左右候上寶冊訖復昇寶還所司其日質明奉冊太尉奉寶司徒讀冊中書令讀寶侍中以次應行事官並集於尚書省候冊寶興乘馬奉迎冊寶至應天門下馬由正門步導入至大安殿門外置冊寶于幄次昇冊寶牀弩手人等分立于左右文武羣官並朝服入次攝太常卿與大樂令帥工人入就位協律郎各就舉麾位昇冊寶案官由西偏門先入置案于殿東西間褥位置訖各退于西階冊寶位後捧冊

官捧寶官舁冊匣官舁寶盞官由西偏門先入至殿西  
階下冊寶褥位之西東向立候閣門報通事舍人引攝  
侍中版奏中嚴訖典儀贊者各就位閣門官引文武分  
左右入於殿階下磚道之東西相向立符寶郎奉八寶  
由西偏門分入升置殿上東西間相向訖分左右立于  
寶後通事舍人引攝侍中版奏外辦扇合服袞冕以出  
曲直華蓋侍衛警蹕如儀殿上鳴鞭訖殿下亦鳴鞭初  
索扇協律郎跪俛伏興舉麾工鼓柷奏乾寧之曲出自  
東房卽座儀使副添香爐烟升殿簾捲協律郎偃麾憂  
敵樂止太常博士通事舍人自冊寶幄次分引冊太常  
卿前導吏部侍郎押冊而行奉冊太尉讀冊中書令舉

冊官于冊後以次從之次太常博士通事舍人二員分引寶禮部侍郎押寶而行奉寶司徒讀寶侍中舉寶官於寶後以次從之由正門入宮縣奏歸美揚功之曲太常卿於冊牀前導至第一埵香案南籍冊寶褥位上少置太常卿與舉冊寶官退於冊寶稍西東向立應博士舍人立於其後昇冊寶牀綴于官等又於其後皆東向太尉司徒中書令侍中皆於冊後面北以次立吏部侍郎禮部侍郎次立于其後立定樂止閣門舍人分引東西兩班羣官合班轉北向立中間少留班路俟立定太常博士通事舍人四員分引太尉司徒中書令侍中吏部禮部侍郎以次各復本班訖博士舍人退以俟初引

時樂奏歸美揚功之曲至位立定樂止典儀曰拜贊者承傳太尉以下應在位官皆舞蹈五拜班首出班起居訖又贊再拜如朝會常儀太常博士通事舍人四員再引太尉司徒中書令侍中吏禮部侍郎復進至冊寶所稍南立定舁冊寶牀弩手繳子官並進前舉冊寶牀興太常博士通事舍人二員分引冊太常卿前導吏部侍郎押冊而行奉冊太尉讀冊中書令舉冊官于冊後以次從之冊初行樂奏肅寧之曲次通事舍人太常博士又二員分引寶禮部侍郎押寶而行奉寶司徒讀寶侍中舉寶官於寶後以次從之詣西階下至冊寶褥位少置冊北寶南樂止舁冊寶牀弩手繳子官等退于後稍

西東向立捧冊官與舁冊官並進前取冊匣升太常博士通事舍人分引冊太常卿側身導冊先升奉冊太尉讀冊中書令舉冊官捧冊官于冊後以次從升冊初行樂奏肅寧之曲進至殿上博士舍人分左右于前楹立以俟讀冊中書令于欄干外前楹稍西立以俟舉冊官捧冊官立于其後奉冊太尉從升至褥位搢笏少前跪置訖執笏俛伏興樂止退於前楹稍西立以俟太常博士立于後太常卿少退東向立舁冊官立于其後皆東向捧冊官先入舉冊官次入讀冊中書令又次入捧冊官四員皆搢笏雙跪捧舉冊官二員亦搢笏兩邊單跪對舉中書令執笏進跪稱中書令臣某讀冊讀訖俛伏

與中書令俟冊興先退通事舍人引降自東階復本班  
訖太常卿降復寶牀前昇冊官並進與捧冊官等取冊  
匣興置於殿東間褥位案上西向捧舉冊官等降自東  
階還本班昇冊官亦退太常博士引奉冊太尉降自西  
階東向立以俟次捧寶官與昇寶官俟讀冊中書令讀  
訖出並進前取寶盃升太常博士通事舍人分引寶太  
常卿側身道寶先升奉寶司徒讀寶侍中舉寶官捧寶  
官于寶後以次後升寶初樂奏肅寧之曲進至殿上博  
士舍人俱退不升並於前楹稍西立俟讀寶侍中於欄  
子外前楹間稍西立以俟舉寶捧寶官立于其後捧寶  
司徒後升至褥位楷笏少前跪置訖執笏俛伏興樂止

司徒退於前楹西立以俟太常少退東向立昇寶官立於其後皆東向捧寶官先入舉寶官次入讀寶侍中又次入捧寶官四員皆搢笏雙跪捧舉寶官二員亦搢笏兩邊單跪對舉侍中執笏進跪稱侍中臣某讀寶讀訖俛伏興侍中俟寶興先退通事舍人引降自西階復本班訖昇寶官進前與捧寶舉寶官等取寶盞興置于殿之西間褥位案上東向捧寶舉寶官等與太常卿俱降自西階及吏部侍郎皆復本班昇寶官亦退太常博士引奉寶司徒次奉冊太尉東向立定博士舍人贊引太尉司徒進詣第一墀香案南褥位立定博士舍人稍退典儀曰拜贊者承傳在位官皆再拜訖博士舍人二員

引太尉詣東階升宮縣奏純成享上之曲至階止閤門使二員引太尉進至前立定樂止閤門使揖贊太尉拜跪賀殿下閤門揖百僚躬身太尉稱文武百僚具官臣等言致賀詞云云俛伏興退至階下博士舍人分引太尉降自東階初降宮縣作肅寧之曲復香案南褥位立定樂止博士舍人少退典儀曰拜贊者承傳太尉司徒及在位羣官俱再拜舞蹈三稱萬歲又再拜訖通事舍人引攝侍中升自東階進詣前楹間躬承旨退臨階西向稱有制典儀曰拜贊者承傳太尉司徒及在位羣官俱再拜躬身宣詞云云宣訖通事舍人引侍中還位典儀曰拜贊者承傳階上下應在位羣官俱再拜舞蹈三

稱萬歲又再拜訖博士舍人引分太尉司徒就百僚位  
初引宮縣作肅寧之曲至位立定樂止閤門舍人分引  
應北面位羣官各分班東西相向立定通事舍人引攝  
侍中升自東階當前楹間跪奏禮畢俛伏興舉麾工鼓  
祝奏乾寧之曲降座入自東房還後閤進膳侍衛警蹕  
如儀扇開樂止捧冊官帥舁冊牀人捧寶官帥舁寶牀  
人皆升殿取匣蓋訖置於牀前引進司官前導通事  
舍人贊引詣東上閤門上進通事舍人分引文武百僚  
等以次出歸幕次賜食以俟上壽上冊寶禮畢有司供  
辦御牀及與宴羣臣位並如曲宴儀攝太常卿與太樂  
令帥宮人入并協律郎各就舉麾位俟舍人報通事舍

人引三師以下文武百僚親王宗室等分左右入至殿  
階下稍南東西相向立通事舍人先引攝侍中版奏中  
嚴少頃又奏外辦扇合鳴鞭協律郎跪俛伏興工鼓祝  
宮縣奏乾寧之曲服通天冠絳紗袍卽座簾捲內侍贊  
扇開殿上下鳴鞭戛鼓樂止儀使副等添香爐烟升通  
事舍人引班首以下合班樂奏肅寧之曲至北向位重  
行立定中間少留班路通事舍人引攝侍中詣東階升  
至殿上少立閤門舍人引禮部尚書出班前俛伏跪奏  
稱禮部尚書臣某言請兄羣臣上壽俛伏興躬身通事  
舍人引攝侍中少退舍人贊禮部尚書再拜訖贊祗候  
復本班內侍局進御牀入次良醞令于殿下橫街南酌

酒訖典儀曰拜贊者承傳在位官皆再拜隨拜三稱萬  
歲訖平立太常博士通事舍人分引揖上公由東階升  
初升宮縣奏肅寧之曲殿上舍人少退二閤使揖上公  
進至進酒褥位樂止宣徽使以爵授上公上公搢笏受  
爵詣榻前跪進受爵訖上公執盤授宣徽使訖二閤使  
揖上公入欄子內贊拜跪殿下閤門揖百僚皆躬身通  
事舍人揖攝侍中進詣前楹間躬承旨退臨階西向稱  
有制典儀曰拜贊者承傳上公及在位羣官皆再拜隨  
拜三稱萬歲訖躬身宣曰得公等壽酒與公等內外同  
慶閣門舍人贊宣諭訖上公與百僚皆舞蹈五拜訖閤  
門舍人引百僚分班東西序北向立博士舍人再引上

公自東階升宮縣奏肅寧之曲至進酒褥位樂止上公  
播笏宣徽使授上公盤上公詣欄子內褥位跪舉酒宮  
縣奏景命萬年之曲飲訖上公進受虛爵訖復褥位以  
爵授宣徽使訖二閤使揖上公退內侍局昇御牀出博  
士舍人並進前分引降自東階宮縣作肅寧之曲閤門  
舍人分引東西兩班隨上公俱復北向位立樂止典儀  
曰拜贊者承傳在位官皆再拜三稱萬歲訖平立殿上  
通事舍人揖攝侍中進詣前楹間躬承旨退臨階西向  
閤門官先揖百僚躬身侍中稱有制典儀曰拜贊者承  
傳在位官皆再拜訖躬身宣曰延王公等升殿典儀曰  
拜贊者承傳在位官皆再拜訖太常博士通事舍人引

王公以下合赴宴羣臣分左右升殿不與宴羣臣分左右捲班出宮縣奏肅寧之曲百僚至殿上座後立樂止內侍局進御牀入依尋常宴會再進第一爵酒登歌奏聖德昭明之曲飲訖樂止執事者行羣臣酒宮縣作肅寧之曲文舞入觴行一周樂止尚食局進食執事者設羣官食宮縣奏保大定功之舞三成止出又進第二爵酒登歌奏天賛堯齡之曲飲訖樂止執事者行羣官酒宮縣作肅寧之曲武舞入觴行一周樂止尚食局進食執事者設羣官食宮縣奏萬國來同之舞三成止出又進第三爵酒登歌奏慶雲之曲飲訖樂止執事者行羣官酒宮縣作肅寧之曲觴行一周樂止尚食局進食執

事者設羣官食官縣奏肅寧之曲食畢樂止閤門官分  
揖侍宴羣臣起立於席後通事舍人引攝侍中詣榻前  
俛伏興跪奏侍中臣某言禮畢俛伏興閤門舍人分引  
羣官俱降東西階內侍局昇御牀出宮縣作肅寧之曲  
至北向位立定樂止典儀曰拜贊者承傳在位官皆再  
拜訖搢笏舞蹈又再拜訖再分班東西序立扇合簾降  
殿上下鳴鞭協律郎俛伏跪舉麾興工鼓祝奏乾寧之  
曲降座入自東房還後閤侍衛如來儀內侍贊扇開扃  
啟樂止通事舍人引攝侍中版奏解嚴所司承旨放伏  
在位羣官皆再拜以次出

肆赦儀

大定七年正月十一日上尊冊禮畢十四日

應天門頒赦前期宣徽院使率其屬陳設應天門之內  
外設御座于應天門上又設更衣御幄于大安殿門內  
外稍東南向閣門使設捧制書箱案于御座之左少府  
監設鷄竿于樓下之左竿上置大盤盤中置金鷄鷄口  
銜絳幡幡上金書大赦天下四字卷而銜之盤四面近  
邊安四大鐵環盤底四面近邊懸四大朱索以備四伎  
人攀緣又設捧制書木鶴仙人一以紅繩貫之引以輓  
轡置于御前欄杆上又設捧鶴畫臺于樓下正中臺以  
弩手四人對舉大樂置設宮縣于樓下又設鼓于宮縣  
之左稍北東向兵部立黃麾仗于門外刑部御史臺大  
興府以囚徒集于左仗外御史臺閣門使設文武百官

位于樓下東西相向又設典儀位于門下稍東西向宣  
徽院設承受制書案于畫臺之前又設皇太子致賀褥  
位于百官班前又設協律郎位于樓上前楹稍東西向  
尚書省委所司設制書位于百官班之北稍東西向司  
天臺鷄唱生于東閣樓之上尚衣局備皇帝常服如常  
日視朝之服尚輦設輦于更衣御幄之前躬謝禮畢皇  
帝乘金輅入應天門至幄次前侍中俛伏跪奏請降輅  
入幄俛伏興皇帝降輅入幄簾降少頃侍中奏中嚴又  
少頃俟典贊儀引皇太子就門下侍立位通事舍人引  
羣官就門下分班相向立侍中就外辦皇帝服常朝服  
尚輦進輦侍中奏請升輦繳扇侍衛如常儀由左翔龍

門踏道升應天門至御座東侍中奏請降輦升座宮縣  
作所司索扇五十扇合皇帝臨軒卽御座樓下鳴鞭簾  
捲扇開執御繖者張于軒前以障日樂止東上閣門使  
捧制書置於箱閣門舍人二員從以俟引繩降木鶴仙  
人通事舍人引文武羣官合班北向立官縣樂作凡分  
班合班則樂作立定則止典儀曰再拜在位官皆再拜  
訖分班相向立侍中詣御座前承旨退稍前南向宣曰  
奉勅樹金鷄通事舍人于門稍前東向宣曰奉勅樹金  
鷄還復位金鷄初立大樂署擊鼓樹訖鼓止竿木伎人  
四人緣繩爭上竿取鷄所銜絳幡展示訖三呼萬歲通  
事舍人引文武羣官合班北向立樓上乘鶴仙人捧制

書循繩而下至畫臺閣使引至班前西向稱有制典儀  
曰拜在位官皆再拜訖以制書授尚書省長官稍前播  
笏跪受訖以付右司官右司官播笏跪受訖長官出笏  
俛伏興退復位右司官捧制書讀宣制位都事對捧有  
司官宣讀至咸赦除之所司御史引罪人詣班南北  
向躬稱脫枷訖三呼萬歲以罪人過右司官宣制訖西  
向以制書受刑部官跪受訖以制書加于笏上退以付  
其屬歸本班典儀曰再拜皇太子以下羣官皆再拜播  
笏舞蹈又再拜侍中于御座前承旨通驛軒宣曰有制  
典儀曰再拜皇太子以下羣官皆再拜侍中宣答宣訖  
歸侍位典儀曰再拜皇太子以下羣官皆再拜播笏舞

蹈又再拜訖典贊儀引皇太子至門下褥位通事舍人引羣官分班相向立侍中詣御座前俛伏跪奏禮畢俛伏興退復位所司索扇宮縣樂作扇合爲降皇帝降座樂止樓下鳴鞭皇帝乘輦還內殿易侍衛如常儀侍中奏解嚴通事舍人承勅羣臣各還次將士各還本所臣下拜赦詔儀宜赦日于應天門外設香案及設香輿于案前又于東側設卓子自皇太子宰臣以下序班定閤門官于箱內捧赦書出門置于案閤門官案東立南向稱有勅贊皇太子宰臣百僚再拜皇太子少前上香訖復位皆再拜閤門官取赦書授尚書省都事都事跪受及尚書省令史二人齊捧同升于卓子讀在位官

皆跪聽讀訖赦書置于案都事復位皇太子宰臣百僚  
以下再拜搢笏舞蹈執笏俛伏興再拜拱衛直以下三  
稱萬歲訖退其降諸書禮亦准此惟不稱萬歲其外郡  
尚書省差官送赦書到京府節鎮先遣人報長官卽率  
僚屬吏從備旗幟音樂綵輿香輿詣五里外迎見送赦  
書官卽于道側下馬所差官亦下馬取赦書置綵輿中  
長官詣香輿前上香訖所差官上馬在香輿後長官以  
下皆上馬後從鳴鈺鼓作樂導至公廳從正門入所差  
官下馬執事者先設案并望闕褥位于庭中香輿置于  
案之前又設所差官位在案之側又設卓子于案之東  
南所差官取赦書置于案綵輿退所差官稱有勅長官

以下皆再拜長官少前上香訖退復位再拜所差官取  
赦書授都目都目跪受及孔目官二員三人齊捧赦書  
登高几上宣讀在位官皆跪聽讀訖都目等復位長官  
以下再拜舞蹈俛伏興再拜公吏以下三稱萬歲禮畢  
明日長官僚屬音樂送至郭外

冊皇后儀 天德二年十月九日冊妃單徒氏爲皇后  
前一日儀鸞司設座勤政殿南向設羣臣次于朝堂大  
樂令展宮縣于殿庭設協律郎舉麾位于樂縣西北東  
向閣門設百官班位于庭並如常朝之儀又設典儀位  
于班位之東北贊者二人在南少却俱西向設冊使副  
位于殿門外之東又設冊使副受命位于百官班前又

言元寶幢次二于殿後東廂俱南向其日諸衛勒所部  
署列黃麾細仗于庭符寶郎奉八寶置於左右吏部侍  
郎奉冊禮部侍郎奉寶匣皆置于牀訖出就門外班大  
樂令協律郎樂工典儀贊者各入就位羣官等依時刻  
集朝堂俱就次各服朝服侍中約刻板奏請中嚴通事  
舍人引羣官入就庭東西相向立以北爲上又引冊使  
副立于東偏門西向門下侍郎引主節奉節立于殿下  
東廊橫街北中書令中書侍郎帥舉捧冊官奉冊牀立  
于節南侍中門下侍郎帥舉捧寶官奉寶牀立于冊牀  
之南俱西向侍中版奏外辦殿上索扇協律郎舉麾官  
縣作皇帝服通天冠絳紗袍出自東房曲直華蓋警蹕

侍衛如常儀卽座南向坐簾捲樂止通事舍人引冊使  
副入宮縣作使副就受命位侍中中書令門下侍郎中  
書侍郎舉捧官依舊西向立羣臣合班橫行北面如常  
朝之儀立定典儀曰再拜贊者承傳班首以下羣臣在  
位者皆再拜班首問起居又再拜閣門官引攝侍中出  
班承制降詣使副東北西向稱有制使副稍前鞠躬再  
拜攝侍中宣制曰命公等授節授后冊寶宣制訖又俱  
再拜侍中還班門下侍郎引主節詣冊使所主節以節  
授門下侍郎門下侍郎執節西向授太尉太尉授付主  
節主節立于使副之左右門下侍郎退還班位中書侍  
郎引冊牀門下侍郎引寶牀立于冊使東北西向以次

授與太尉太尉皆捧受冊牀置于北寶牀置于南侍中  
中書令禮儀使舉捧冊寶官及舁牀者退于東西墀道  
之左右相向立門下侍郎中書侍郎退還班位典儀曰  
再拜贊者承傳羣官在位者皆再拜訖分班東西相向  
立捧舉舁冊寶牀者進冊牀先行讀冊官次之寶牀先  
行讀寶官次之舉舁官各分左右通事舍人引冊使隨  
之以行持節者前導太尉初行宮縣樂作出殿門樂止  
攝侍中出班升殿奏侍中臣言禮畢殿上索扇簾降宮  
縣樂作降座入自東房樂止通事舍人引羣官在位者  
以次出俟太尉司徒復命禮畢還內先是有司預設太  
尉司徒本品輦車鹵簿于門外至殿門左右排列俟使

副出鼓吹振作禮儀使舉捧官執節者并擡昇人以冊  
寶少駐于泰和門太尉司徒及讀冊寶官暫歸幕次內  
侍閣門引入泰和殿俟至殿下位鼓吹止有司預供帳  
泰和殿設皇后座于晨前殿上垂簾又設東西房于座  
之左右稍北又設受冊位于殿庭西階之南東向又設  
內命婦次于殿之左右大樂令設宮縣于庭協律郎設  
舉麾位于殿上又設冊寶次于門外又設行事官次于  
門左右又設外命婦次于門之內其日諸衛于殿門外  
畧設黃麾細仗有司設二步障于殿之西階簾前設扇  
左右各十紅繖一在西階欄杆外又設舉冊寶案位于  
使副之前北向又設宣徽使位于北廂南向司贊設內

外命婦以下陪列位于殿庭墀道之左右每等重行異位北向內命婦在後又設司寶位于東階東南贊者二人在南少退俱西向質明執事官大樂令等各就位皇帝常服乘龍飾肩輿至泰和殿後閣近伏導衛如常儀宣徽使奏中嚴冊使副入門宮縣樂作俟冊使庭中立樂止冊在北寶在南使副立于牀後禮儀使帥持節者立于前舉捧冊寶官立于冊寶牀左右讀冊寶官各立于其後宣徽使奏外辦內侍閣門官引后出後閣門宮縣樂作簾捲皇后降自西階左右步障繖扇從至階下望勤政殿御閣所在立樂止冊使進于右宣曰有制閣門使內侍贊再拜冊使宣曰制遣太尉臣某司徒臣某

恭授后冊寶閣門使內侍贊再拜冊使少退中書令侍  
中及舉捧官率擡舁人奉冊寶以次進于前宮縣作冊  
寶牀自東階升並置于殿之前楹間冊牀在北寶牀在  
南中留讀冊寶官立位並去帕及蓋擡舁人執之退立  
于西朶殿舉擡官分左右相向立讀冊寶官各立于牀  
之東西向旣立定樂止閣門使內侍贊再拜捧謝表官  
以表授左立內侍內侍以授后受訖以付右立內侍內  
侍持表立于右閣門使贊再拜訖冊使還宮縣樂作持  
表內侍以表付閣門官隨冊使行冊使副至門鼓吹部  
作如來儀入西偏門鼓吹止冊使副至御閣所在俛伏  
跪奏太尉臣某司徒臣某奉制授冊寶禮畢俛伏興退

持表閣門官進表近侍接入進讀訖退初冊使退及門  
樂止閣門內侍引后自西階升殿宮縣樂作繳扇止于  
簾外退于左右朶殿前步障止于階下卷之后于座前  
南向立樂止中書令詣冊牀南立北向稱中書令臣某  
謹讀冊讀畢降自東階欄外第一墀上西向次侍中詣  
寶牀南立北向揖稱侍中臣某讀寶讀畢降階立于中  
書令之北西向內侍閣門引升座宮縣樂作坐定樂止  
舉捧官以次招擡舁人持帕蓋覆匣牀奉置殿之左右  
冊牀在東寶牀在西置訖舉捧官以次降階立于中書  
令侍中之後立定合班北向閣門贊再拜拜訖降東階  
退出殿門其擡舁人置冊寶牀于東西訖各由朶殿下

階於侍中等班後直出殿門以俟復入擡冊入宮受冊  
表謝訖內侍跪奏禮畢閤門引內外命婦陪列者以次  
進就北向位班首初行宮縣樂作至位樂止閤門曰再  
拜命婦皆再拜閤門引班首自西階升樂作至階樂止  
進當座前北向躬致稱賀訖降自西階樂作至位樂止  
閤門曰再拜舍人承傳命婦等皆再拜閤門使前承令  
降自西階詣命婦前西北東向稱有教旨命婦等皆拜  
閤門使宣曰祇奉聖恩授以寶冊榮幸之至兢厲增深  
所賀知舍人曰再拜命婦皆再拜訖內侍引內命婦還  
宮班首初行樂作出門樂止內侍引外命婦出次宣徽  
奏稱禮畢降坐宮縣樂作入東房樂止歸閤宮縣樂作

至閣樂止更常服內侍承教旨宣外命婦入會並如常  
儀會畢閣門引外命婦降階橫班北向舍人曰再拜訖  
以次出還家如來儀中書門下侍郎復以引進司帥擡  
舁人進冊寶入內付與都點檢司退別日會羣官會妃  
主宗室等賜酒設食簪花教坊作樂如內宴之儀十一  
日朝永壽永寧兩宮皇后既受冊越二日內侍設座于  
所御殿南向其日夙興宜徽使版奏中嚴質明諸侍衛  
宮人俱詣寢殿奉迎宜徽使版奏外辦后首飾褱衣御  
車內侍前導降自西階以出侍衛如常儀至太后之裡  
門外降車障扇侍衛如常儀入立于西廂東向將至宜  
徽使版奏請中嚴既降車宜徽使版奏外辦太后常服

宣徽使引升座南向宣徽使引后進升自西階北面再拜進跪致謝詞存撫賜酒食並如家人之儀禮畢宣徽使引降自西階以出出門宣徽使奏禮畢降座入宮

冊皇太后儀 其日質明有司各具繖扇侍衛如儀及兵部約量差軍兵并文武百官詣兩宮迎請引導皇太后入內並赴受冊殿入御幄侍衛如式次奉冊太尉等俱以冊置于案奉寶司徒等俱以寶置于案皆盛以匣覆以帕詣別殿門外幄次教坊提點率教坊入侍衛官各就列皇帝常服乘輿至別殿後幄次通事舍人引宣徽使版奏中嚴復位少頃又奏外辦幄簾捲教坊樂作扇合兩宮皇太后出自後幄並卽御座南向扇開樂止

分左右少退通事舍人引文武百僚班左入依品重行  
西向立定通事舍人喝起居班依常朝例起居七拜訖  
引文武百僚班分東西相向立通事舍人太常博士贊  
引太常卿前導押冊官押冊而行奉冊太尉讀冊中書  
令舉冊官等以次從之次押寶官押寶而行奉寶司徒  
讀寶侍中舉寶官等以次從之俱自正門入教坊樂作  
至殿庭西階下少東北向于褥位少置樂止冊北寶南  
通事舍人太常博士贊引太常卿前導押冊官押冊升  
樂作奉冊太尉等從之進至兩宮太后座前褥位樂止  
兩官冊寶齊上齊讀舉冊官夾侍奉冊太尉各搢笏北向跪俛伏  
興退立讀冊中書令俱進向冊前跪奏稱攝中書令具

官臣某謹讀冊舉冊官卑跪對舉中書令各搢笏讀訖  
執笏俯伏興搢笏捧冊興于位東迴冊由北向並進跪  
置于御座前褥位中書令舉冊官俱降還位奉冊太尉  
並降階東向以俟押寶官押寶升樂作奉寶司徒等從  
之進至兩宮皇太后座前褥位樂止舉寶官夾侍奉寶  
司徒各搢笏北向跪俛伏興退立讀寶侍中俱進當寶  
前跪奏稱攝侍中具官臣某謹讀寶舉寶官卑跪對舉  
侍中各搢笏讀訖執笏俯伏興搢笏捧寶興於位東迴  
寶西北向並進跪置御座前褥位冊之南通事舍人太  
常博士贊引太尉司徒以次應行事官俱降自西階復  
本班序立宣徽使一員詣皇帝御幄前俛伏跪奏臣某

謹請皇帝詣兩宮皇太后前行稱賀禮俛伏興贊引皇帝再拜又奏請北向跪皇帝賀曰嗣皇帝臣某云云俛伏興又再拜訖又奏請皇帝少立內侍承旨退西向稱兩宮太后旨云云皇帝再拜宣徽使前引皇帝歸幄常服乘輿還內侍衛如來儀應階下文武百僚重行立定通事舍人喝拜在位皆再拜通事舍人引太師升俛伏跪奏稱文武具官臣某等稽首言皇太后殿下顯對冊儀永安帝養仰祈福壽與天同休俛伏興降自西階復位立定通事舍人贊在位官皆拜舞蹈三稱萬歲又再拜宣徽使升自東階取旨退臨階西向稱兩宮皇太后旨通事舍人贊在位官皆再拜畢宣曰公等忠敬盡心

推崇協力膺茲令典感媿良深宣訖還位通事舍人贊  
謝宣諭拜在位官皆再拜舞蹈三稱萬歲又再拜通事  
舍人分引應北向官各分班東西立宣徽使升自東階  
奏稱具官臣等言禮畢降還位扇合皇太后並興教坊  
樂作降座還殿後幄次開扇樂止通事舍人引宣徽使  
奏嚴中書侍郎等各帥捧冊牀官升殿跪捧寶並置于  
牀次門下侍郎等各帥捧寶牀官升殿跪捧寶並置于  
牀訖通事舍人引詣東上閣門投進所司文武百僚以  
次出皇太后常服乘輿各還本宮引道如來儀文武百  
僚詣東上閣門拜表賀皇帝退禮畢各赴本宮受內外  
命婦稱賀所司預于殿內設皇太后御座司賓引內外

命婦於殿庭北向依按前序立尚儀奏請皇太后常服  
卽座司贊曰再拜命婦皆再拜司賓引班首詣西階升  
跪賀稱妾某氏等言伏惟皇太后殿下天資聖善昭受  
鴻名凡在照臨不勝欣忭興隆階復位司贊曰再拜內  
外命婦皆再拜尚宮乃宣答曰膺茲典禮感愧良深司  
贊曰再拜在位者皆再拜退赴別殿賀皇帝亦如賀皇  
太后之儀惟不致詞不宜答

冊皇太子儀 前三日遣使同日奏告天地宗廟冊前  
一日宣徽使院帥儀鸞司設御座于大安殿當中南向  
設皇太子次于門外之東西向又設文武百僚應行事  
官東宮官等次于門外之東西廊又設冊寶幄次于殿

後東廂俱南向又設受冊位于殿庭樹階之南工部官與監造冊寶官公服自製造所道引冊寶牀由宣華門入約宣徽院同檢視畢赴幄次安置大樂令帥其屬展樂縣于庭兵部帥其屬設黃麾仗于大安殿門之內外其日質明文武百僚應行事官並朝服入次東宮官各朝服自東宮乘馬導從至左翔龍門外下馬入就次通事舍人分引百官入就次東西相向次引侍中中書令門下侍郎中書侍郎及捧昇冊寶官詣殿後幄次前立少頃奉冊寶出幄次由大安殿東階至庭中褥位權置訖奉引冊寶官立于其後皇太子服遠遊冠朱明衣出次三師三少以下導從立于門外侍中奏中嚴符寶郎

奉入寶由東西偏門入升置御座之左右侍中奏外辦  
內侍承旨索扇扇合皇帝服通天冠絳紗袍以出曲直  
華蓋侍衛如常儀鳴鞭宮縣樂作皇帝出自東序卽御  
座爐烟升扇開簾捲樂止典贊儀引皇太子入門宮縣  
樂作至位樂止師少以下從人立于皇太子位東南西  
向典儀贊皇太子再拜搢笏舞蹈又再拜奏聖躬萬福  
又再拜引近東西向立師少以下并奉昇冊寶等官各  
赴百官東班樂作至位樂止通事舍人引羣官俱橫班  
北向典儀贊拜在位官皆再拜搢笏舞蹈又再拜起居  
又再拜畢百官各還東西班師少以下并行事官各還  
立位典贊儀引皇太子復受冊位樂作至位樂止侍中

承旨稱有制皇太子已下應在位官皆再拜躬身侍中  
宣制曰冊某王爲皇太子又再拜通事舍人太常博士  
引中書令詣讀冊位中書侍郎引冊匣置于前捧冊官  
西向跪捧皇太子跪讀畢俛伏興皇太子再拜中書令  
詣捧冊位奉冊授皇太子搢圭跪受冊以授右庶子右  
庶子跪受皇太子俛伏興右庶子以冊興置于牀中書  
令以下退復本班次通事舍人太常博士引侍中詣奉  
寶位門下侍郎引寶盥立于其右侍中奉寶授皇太子  
搢笏跪受以授左庶子左庶子跪受皇太子俛伏興左  
庶子以寶興置于牀侍中以下退復本班典儀贊再拜  
畢引皇太子退初行樂作左右庶子帥其屬昇冊寶牀

以出出門樂止侍中奏禮畢內侍承旨索扇扇合簾降  
鳴鞭樂作皇帝降座入自西序還後閣侍衛如來儀扇  
開樂止侍中奏解嚴所司承旨放仗衛以次出皇太子  
入次改服公服還東宮導從如來儀冊後二日兵部設  
黃麾仗于仁政殿門之內外陳設並如大安殿之儀百  
官服朝服皇太子公服至次改服遠遊冠朱明衣通事  
舍人引百官入至階下立班東西相向典儀引皇太子  
執圭出次立于門外侍中奏中嚴少頃又奏外辦皇帝  
出自東序卽座簾捲通事舍人引百官俱橫班北向典  
儀贊拜在位官皆再拜搢笏舞蹈又再拜起居又再拜  
訖分班皇太子捧表入至拜表位立俟閣門使將至單

跪捧表閣門使接表皇太子俛伏興典儀贊再拜搢圭  
舞蹈又再拜俟讀表畢侍中承旨退稱有制典儀贊再  
拜興躬身宣訖典儀贊再拜搢圭舞蹈又再拜引皇太  
子退侍中奏禮畢扇合鳴鞭入西序還後閣侍衛如來  
儀侍中奏解嚴放仗百官以次出後二日百官奉表稱  
賀如常儀

皇太子生日正旦受賀儀 太定二年世宗命有司議  
親王百官及妃主命婦見皇太子禮有司按唐宋舊儀  
擬親王宗室賀皇太子依冊畢受賀禮然唐禮元正復  
有降階見伯叔答羣官再拜之文又無妃主命婦見太  
子之禮稽古今文凡應致恭之臣相見或貴賤殊隔或

長幼親戚任從私禮請自今若在東宮候皇太子便服則當從私禮接若三師以下遇皇太子誕日在御前則候皇太子先進酒畢百官望皇太子再拜班首跪進酒又再拜若賜酒卽當殿跪飲畢又再拜以爲定制命頒行之十二月晦太子乃奏狀曰按禮文親王并一品宗室皆北面拜伏臣但答揖而已雖曰尊宗子而在長幼惇敘之間誠所未安當時遽蒙頒降未獲謙讓明日元正有司將舉此禮伏望聖慈許臣答拜庶敦親親友愛之義上從之命尙書省頒下所司若皇太子生日則公服左上露臺欄子外先再拜二閣使齊揖入欄子內拜跪祝畢就拜興復位再拜又再拜接臺進酒退跪候飲

畢接盞復位轉臺與執事者再拜宜微使以酒進皇帝  
親賜酒接盞稍退跪飲畢宜微使接盞復位再拜復揖  
入欄子內搢笏受賜物畢出笏興復位再拜退更衣入  
殿稍東西向立皇妃等進勸生日酒皇太子跪皇妃等  
亦跪飲畢各再拜羣臣致賀則其日質明皆公服集于  
門外少詹事奏請內嚴又奏外備典儀引升座文武官  
臣入就庭下重行北向立典儀曰再拜在位官皆再拜  
班首稍前跪奏元正首祚生日則云慶誕令辰伏惟皇  
太子殿下福壽千秋賀畢復位典儀曰再拜官官皆再  
拜坐受分東西序立次引東宮三師于殿上三少于殿  
柱外北向東上立皇太子詣南向褥位典儀曰再拜師

少皆再拜班首同前稱賀復位執事者酌酒一卮班首  
奏進樂作飲訖樂止回勸師少畢各復位典儀贊師少  
再拜皇太子答拜師少出皇太子就坐次引親王入欄  
子內一品宗室于欄子外餘宗室序班庭下拜致賀進  
酒如上儀皇太子答拜畢就坐復引隨朝三師三公宰  
執于殿上三品以下職事官于露階上四品以下于庭  
下北向每等重行以東爲上立皇太子詣褥位典儀曰  
再拜上下皆再拜畢班首少前致賀復位執事者酌酒  
一卮班首奉進樂作飲畢樂止如有進獻如常儀回勸  
三師三公餘殿上羣官則令執事者以盤行酒飲畢典  
儀曰再拜上下皆再拜乃答拜引羣官以次出少詹事

跪奏禮畢

皇太子與百官相見儀 三師三公欄子內北向躬揖  
班首稍前奉候皇太子離位稍前正南立答揖率執及  
一品職事官扣欄子北向躬揖答揖如前二品職事官  
欄子外向南躬揖皇太子起揖三品職事官露階稍南  
躬揖皇太子坐揖四品以下職事官宮庭下躬揖跪問  
候皇太子坐受太子太傅太保與隨朝三師同東宮三  
少與隨朝二品同詹事以下並在庭下面北每品重行  
以東爲上再拜稍前問候又再拜皇太子坐受 七年  
定制皇太子赴朝許與親王宰執相見餘官宗室並迴  
避後亦許與樞密使副御史大夫判宗正東宮三師相

見九年定制凡皇太子出于都門三里外設褥位三公宰執以下公服重行立皇太子便服三公宰執以下鞠躬班首致辭云青宮萬福再拜皇太子答拜退迎送皆同章宗時禮部尚書張行簡言唐制僕射宰相上日百官通班致賀降階答拜國朝皇太子元正生日三師三公宰執以下須羣官同班拜賀皇太子立受再答拜今尚書省宰執上日分六品以下別爲一班揖賀宰執坐答揖左右司郎中五品官廷揖亦坐答之臣謂身坐舉手答揖近千坐受也宰執受賀其禮乃重于皇太子恐于義未安別燠明微禮之大節伏請宰執上日令三品以下官同班賀宰執起立依見三品官儀式通答

揖上曰此事何不早辨正之如都省擅行卿正之是矣  
行簡對曰禮部蓋嘗參酌古今典禮擬定儀式省廷不  
敢輒改以奏下尚書省議遂用之宰執上日三品以下  
羣官通班賀起立答拜自此始

外國使入見儀 皇帝卽御座鳴鞭報事畢殿前班小  
起居畢至侍立位引臣僚左右入丹墀小起居宰執上  
殿其餘臣僚分班出閣門使奏使者入見勝子先引宋  
使副出笏捧書左入至丹墀北向立閣使左下接書捧  
書者單跪受書拜起立閣使左上露階右入欄內奏封  
全轉讀畢引使副左上露階齊揖入欄內揖使副鞠躬  
使少前拜跪附奏畢拜起復位立待宣問宋皇帝時並

鞠躬受勅旨再揖鞠躬使少前拜跪奏畢起復位齊退却引使副左下至丹墀北向立禮物右入左出盡揖使副旁折通班再引至丹墀舞蹈五拜不出班奏聖躬萬福再拜揖使副鞠躬使出班謝面天顏復位舞蹈五拜再揖使副鞠躬使出班謝遠差接伴兼賜湯藥諸物等復位舞蹈五拜各祇候引右出賜衣次引宋人從入通名以下再拜不出班又再拜各祇候亦引右出次引高麗使左入至丹墀北向畧立引使左上露階立定揖橫使鞠躬正使少前拜跪附奏畢拜起復位間使宣問高麗王時並鞠躬受勅旨畢再揖橫使鞠躬正使少前拜跪奏畢拜起復位齊退却引左下至丹墀面殿立定禮

物右入左出盡揖使旁折通班畢引至丹墀通一十七拜各祇候平立引左階立次引夏使見如上儀引右階立次再引宋使副左入至丹墀謝恩舞蹈五拜各祇候平立次引高麗夏使並至丹墀三使並鞠躬有勅賜酒食舞蹈五拜各祇候引右出次引宰執下殿禮畢

曲宴儀 皇帝卽御座鳴鞭報時畢殿前班小起居到侍立位引臣僚并使客左入旁折通班至丹墀舞蹈五拜不出班奏聖躬萬福又再拜出班謝宴舞蹈五拜各上殿祇候分引與宴官上殿其餘臣僚右出次引宋使從人入至丹墀再拜不出班奏聖躬萬福又再拜有勅賜酒食又再拜引左廊立次引高麗夏使從人入分引

左右廊立果牀入進酒皇帝舉酒時上下侍立官並再拜接盞畢候進酒官列位當坐者再拜坐卽行臣使酒傳宣立飲畢再拜坐次從人再拜坐至四盞餅茶入致語聞鼓笛時揖臣使并從人立口號絕坐宴并侍立官並再拜坐次從人再拜坐食入五盞歇宴教坊謝恩畢揖臣使起果牀出皇帝起入閣臣使下殿歸幕次賜花從人隨出戴花畢先引從人入左右廊立次引臣使入左右上殿位立皇帝出閣坐果牀入坐立並再拜坐次從人再拜坐九盞將曲終揖從人至位再拜引出聞曲時揖臣使起再拜下殿果牀出至丹墀謝宴舞蹈五拜分引出

朝辭儀 皇帝卽御座鳴鞭報時畢殿前班小起居至侍立位引臣僚合班人至丹墀小起居引宰執上殿其餘臣僚分班出閣使奏辭膀子先引夏使左入旁折通班畢至丹墀再拜不出班奏聖躬萬福又再拜揖使副鞠躬使出班戀闕致詞復位又再拜唱各好去引右出次引高麗使如上儀亦引右出次引宋使副左入旁折通班畢至丹墀依上通六拜各祇候平立閣使賜衣馬鞠躬聞勅再拜賜衣馬畢平身楷笏卑跪受別錄物過盡出笏拜起謝恩舞蹈五拜有勅賜酒食舞蹈五拜引使副左上露階齊揖入欄內揖鞠躬大使少前拜跪受書起復位揖使副齊鞠躬受傳達畢齊退引左下至丹

塤鞠躬唱各好去引右出次宰執下殿禮畢 先是熙  
宗時夏使入見改爲大起居定制以宋使列于三品班  
高麗夏列于五品班皇統二年六月定臣使辭見臣僚  
服色拜數止從當朝起居三國使班品如舊俟殿前班  
及臣僚小起居畢宰執升殿餘臣分班畢乃令行人見  
及朝辭之禮凡入見則宋使先禮畢夏使入禮畢而高  
麗使入朝辭之賜則遣使就賜于會同館惟宋使則庭  
授

續文獻通考卷之一百十七終